



# MARKAS ANGKATAN TENTERA MALAYSIA BAHAGIAN HAL EHWAL AWAM - J7

Wisma Pertahanan  
Jalan Padang Tembak  
50634 KUALA LUMPUR  
Tel: 03-2071 6423 Faks: 03-2071 6426

MATM/BHEA-J7.100-2/1/1(03)-12/04

## SIARAN AKHBAR

### MAJLIS MENYAMBUT KETIBAAN PANGLIMA ANGKATAN TENTERA KE-21

KUALA LUMPUR, 7 Januari 2020 - YBhg Jeneral Tan Sri Dato' Sri Haji Affendi bin Buang TUDM telah disambut secara rasmi di Kementerian Pertahanan sebagai Panglima Angkatan Tentera Ke-21 sejak beliau memegang dan menerima jawatan tersebut pada satu Majlis Serah Terima Tugas Panglima Angkatan Tentera yang telah diadakan pada 3 Januari 2020 lalu.

Ketibaan beliau di Wisma Pertahanan disambut oleh Panglima-Panglima Perkhidmatan dan pegawai-pegawai kanan Angkatan Tentera Malaysia serta pengurusan tertinggi Kementerian Pertahanan.

YBhg Jeneral Tan Sri Dato' Sri Haji Affendi bin Buang TUDM seterusnya mengambil tabik hormat dan menerima Kawalan Kehormatan Utama (KKU) yang diberikan oleh Batalion Pertama Rejimen Askar Melayu Diraja. Kontinjen KKU yang berkekuatan 3 Pegawai dan 103 Anggota Lain-lain Pangkat berkenaan telah diketuai oleh Mejar Mohd Izham bin Ahmad Rashidi serta diiringi oleh Pancaragam Pusat Rejimen Askar Melayu Diraja.

Jeneral Tan Sri Dato' Sri Haji Affendi bin Buang TUDM dilahirkan pada 21 Ogos 1962 di Kuching, Sarawak dan mendapat pendidikan awal di Kuching, Sarawak. Pada tahun 1978, beliau telah dipilih untuk melanjutkan pelajaran menengah di Maktab Tentera Diraja, Sungai Besi sehingga berjaya memperolehi Sijil Peperiksaan Malaysia (MCE) pada tahun 1979.

Jeneral Tan Sri Dato' Sri Haji Affendi menyertai Angkatan Tentera Malaysia sebagai Pegawai Kadet TUDM dalam tahun 1980 dan menerima latihan asas di Sekolah Pegawai Kadet, Sebatang Kara, Port Dickson. Pada tahun 1981, beliau telah dipilih untuk menjalani Latihan Asas Terbang di TUDM Alor Setar dan berjaya ditauliahkan ke dalam Tentera Udara Diraja Malaysia sebagai Leftenan Muda pada tahun 1982.

Berbekalkan pengetahuan, kemahiran serta keberanian dan kematangan, beliau telah ditugaskan ke Pusat Latihan Terbang No. 3 di TUDM Kuantan untuk penukaran latihan asas jet pejuang menggunakan pesawat MB-339A. Di sinilah titik permulaan kerjaya beliau sebagai juruterbang pesawat pejuang di mana beliau seterusnya mengorak langkah dengan penukaran kepada latihan operasi menggunakan pesawat pejuang McDonnell Douglas A-4 Skyhawk di No. 9 Skn pada Oktober 1984 diikuti dengan penglibatan operasi pertamanya menggunakan pesawat tersebut di No. 6 Skn pada Jun 1985.

Sebagai pengiktirafan terhadap pengetahuan, kemahiran dan sikap yang positif sebagai juruterbang jet pejuang, Jeneral Tan Sri Dato' Sri Haji Affendi telah dihantar untuk mengikuti kursus Jurulatih Penerbangan pada Jan 1988 di ILIT, TUDM Alor Setar dan kemudiannya dihantar semula ke No 9 Skn pada Julai 1988 sebagai Jurulatih Penerbangan pesawat A-4 Skyhawk.

Pada tahun 1994, beliau telah dipilih sebagai salah seorang ahli untuk Tim Projek MiG-29, yang mana kemudiannya dilantik sebagai Tim Teknikal Projek MiG-29 TUDM di Rusia. Bersama-sama dengan mantan PTU, Jeneral Tan Sri Rodzali (Bersara) dan Leftenan Jeneral Dato' Sri Ackbal bakal Panglima Tentera Udara, Jeneral Tan Sri Dato' Sri Haji Affendi merupakan perintis bagi induksi MiG-29 ke dalam keupayaan operasi TUDM dan memainkan peranan penting dalam proses pemindahan bagi pengumpulan data keupayaan operasi MiG-29. Jeneral Tan Sri Dato' Sri Haji Affendi juga salah seorang pengasas MiG-29 TUDM yang dalam penubuhan pasukan aerobatik taktikal lebih dikenali sebagai "*Smokey Bandits*". Beliau kemudian mengetuai "*Smokey Bandits*" sepanjang tempoh perkhidmatan beliau sebagai Pegawai Memerintah No 17/19 Skn.

Sepanjang kerjaya dalam operasi penerbangan beliau, Jeneral Tan Sri Dato' Sri Haji Affendi adalah salah seorang yang disegani dan amat dikenali sebagai juruterbang pejuang yang cekap. Beliau terlibat secara aktif dalam pelbagai operasi udara seperti operasi *Close Air Support* dan *Battlefield Interdiction Mission* ketika menentang pemberontakan komunis pada lewat 1980-an. Penglibatan beliau dalam pengoperasian pesawat A-4 Skyhawk dan MiG-29 meliputi rondaan di seluruh Malaysia termasuk Gugusan Semarang Peninjau (pos-pos Malaysia di Laut China Selatan) dan Zon Maritim Malaysia di seluruh Semenanjung dan Malaysia Timur.

Pengetahuan, kemahiran dan sikap yang baik yang ditunjukkan oleh Jeneral Tan Sri Dato' Sri Haji Affendi menjadi lebih terserlah dan berkembang apabila digabungkan dengan pengalaman beliau semasa menjawat pelbagai jawatan pemerintah di peringkat taktikal, peringkat pengoperasian malahan di peringkat strategik. Dari tahun 1997 setelah menghadiri kursus di Maktab Turus Angkatan Tentera (MTAT) hingga 2002, beliau telah ditugaskan ke No. 1 Divisyen Udara sebagai Pegawai Staf 2 Piawaian, Keselamatan dan Kesiapan dan kemudiannya sebagai Pegawai Staf 1 Operasi Pejuang. Semasa memegang jawatan ini, Jeneral Tan Sri Dato' Sri Haji Affendi bertanggungjawab ke atas kesiapsiagaan operasi dan kompetensi keseluruhan anak kapal pesawat pejuang TUDM. Beliau kemudiannya diamanahkan untuk memerintah No 17/19 Skn dari tahun 2002 hingga 2004.

Sekembalinya beliau ke Tanah Air pada tahun 2006 setelah mengikuti Kursus Pertahanan dan Kajian Strategik di Pusat Pengajian Pertahanan dan Strategik (CDSS) Australia pada tahun 2005 (mendapat *Masters of Arts* -Pengajian Strategik dari Deakin University, Australia), beliau telah mengambil alih tugas sebagai komander pangkalan di Pangkalan Udara Butterworth sehingga 2007. Pada tahun 2008 hingga 2009 beliau telah ditugaskan sebagai Pengarah J5 (Perancangan dan Kontijensi) di Ibu Pejabat Markas Angkatan Bersama. Pada Disember 2009, beliau telah dinaikkan ke pangkat Brigadier Jeneral TUDM dan telah dilantik sebagai Ketua Pengarah Operasi dan Eksekutif di Markas Pemerintahan Operasi Udara (MPOU) sehingga akhir tahun 2010 dan kemudian mengikuti kursus di *Royal College of Defence Studies* (RCDS) di United Kingdom selama setahun iaitu pada tahun 2011.

Setelah menamatkan kursus di United Kingdom, Jeneral Tan Sri Dato' Sri Haji Affendi telah dihantar semula ke MPOU pada September 2011 sekali lagi sebagai Ketua Pengarah Operasi dan Eksekutif dan seterusnya beliau dinaikkan pangkat dalam jawatan itu ke pangkat Mejar Jeneral TUDM pada tahun 2013. Pada Julai 2014 beliau telah dinaikkan pangkat sebagai Leftenan Jeneral TUDM dan dilantik sebagai Panglima Angkatan Bersama (PAB) di Markas Angkatan Bersama. Pada akhir tahun 2014, Jeneral Tan Sri Dato' Sri Haji Affendi dilantik pula sebagai Panglima Operasi Udara (PANGOP). Beliau berkhidmat sebagai Panglima Operasi Udara selama kira-kira satu tahun sebelum beliau dilantik sebagai Timbalan Panglima Tentera Udara (TPTU) iaitu pada tahun 2015. Pada 21 Disember 2016, Jeneral Tan Sri Dato' Sri Haji Affendi bin Buang TUDM telah dinaikkan pangkat sebagai Panglima Tentera Udara dan mengambil alih tugas daripada Jeneral Tan Sri Dato' Sri Roslan bin Saad TUDM untuk menjadi Panglima Tentera Udara Diraja Malaysia yang ke-18.

Untuk menghargai perkhidmatan dan jasa-jasa beliau kepada negara, Jeneral Tan Sri Dato' Sri Haji Affendi telah dianugerahkan beberapa pingat dan anugerah oleh Kerajaan Persekutuan dan Kerajaan Negeri serta Angkatan Tentera Malaysia. Selain daripada pingat perkhidmatan, beliau telah dianugerahkan Pingat Tentera Udara (PTU), yang dianugerahkan kepada anak kapal Tentera Udara Diraja Malaysia untuk keberanian dalam melaksanakan tugas penerbangan. Beliau telah dianugerahkan beberapa pingat penghormatan tentera termasuk Panglima Gagah Angkatan Tentera (PGAT), Panglima Setia Angkatan Tentera (PSAT), Pahlawan Angkatan Tentera (PAT) dan Kesatria Angkatan Tentera (KAT).

Jen Tan Sri Dato' Sri Haji Affendi dikurniakan Darjah Kebesaran Panglima Setia Mahkota (PSM) oleh SPB Yang DiPertuan Agong yang membawa gelaran Tan Sri. Beliau juga telah dikurniakan Darjah Kebesaran oleh Duli Yang Maha Mulia Sultan Pahang, Ahli Mahkota Pahang (AMP), Setia Ahmad Shah Pahang (SAP), Darjah Indera Mahkota Pahang (DIMP) dengan gelaran Dato' dan Sri Sultan Ahmad Shah Pahang (SSAP) yang membawa gelaran Dato' Sri. Jeneral Tan Sri Dato' Sri Haji Affendi juga telah menerima Darjah Kesatria Mahkota Kelantan Yang Amat Perkasa (SPKK) yang membawa gelaran Dato' oleh Kebawah Duli Yang Maha Mulia Sultan Muhammad V dan Darjah Panglima Pangkuan Negeri (DPPN) yang membawa gelaran Dato' Seri oleh Yang di-Pertua Pulau Pinang.

Jeneral Tan Sri Dato' Sri Haji Affendi bin Buang TUDM telah berkahwin dengan Yang Amat Mulia Tengku Puteri Seri Teja Hajjah Puan Sri Tengku Muhaini binti Al-Marhum Sultan Haji Ahmad Shah.

**-TAMAT-**

**“KEDAULATAN NEGARA TANGGUNGJAWAB BERSAMA”**

---

**Bahagian Hal Ehwal Awam - J7  
Markas Angkatan Tentera Malaysia  
KUALA LUMPUR  
Tel: 03-20716424**

**Dikeluarkan pada 7 Januari 2020, 8:30 pagi**